

明季稗史彙編

明倫彙編 家範典

明季稗史彙編卷二十四

慈谿應高臣著
更名廷吉字榮臣戊辰進士

青燼屑

思宗御極之元年五鳳樓前獲一黃袱內裹小畫一卷題云天啟七崇禎十七還有福王一清晨內侍檢得卽奏御前思宗因傳巡皇城各官究所從來時袁槐眉先生以省垣隸皇城事奏上曰此事不經何由得至大內且臣等巡視俱各未見而內臣特奏之焉知非有奸人包藏禍心潛伏肘腋而爲此耶如一追究將來必有造訛立異簧惑聖聽者矣上可其奏立命火之

丁丑予計偕北上禮闈竣事訪宣武門外斜街見鄉民數輩擁一白雞羽毛純白喙距俱赤云重四十斤索價一兩觀者環堵莫之敢售蓋不知爲何物也偶閱字彙鳥獸部鷺字註云鷺形如雞毛色純白喙距純紅所見之國亡

癸未六月夜坐納涼忽陰雲四合雷電交作爆光之中出火星一道聲如炮炭考之天元玉曆曰電中聚火人君絕世

壬癸年間都下變異種種如天津撫院將台旂竿終夜號泣撫臣具疏以聞惟牲祭之亦不輟

鳳陽祖陵悲號震動三年不止守陵內臣大集雲水齋醮彌夕鸞鶴翔空累數千百震號如故五鳳樓前門拴風斷三截京師黑眚見大內百怪出如此之類紀述未盡

都人士爲予言癸未春京營巡捕軍夜宿旗軍之西首更定時一老人囑曰今夜子時有一婦人渾身縞素涕泣而至自西向東汝切不可放過如放過爲害不淺至雞鳴卽無事矣吾乃地祇神靈將來救此一方民命如違吾言當得重譴至夜將半果有一婦泣訴如前云歸母家不意夫死急欲奔喪不避昏夜邈者謹如前戒堅執不允婦亦暫退迨漏五下邈者睡去婦折而東矣輒復旋反蹴邈者醒而告之曰吾乃喪門神也上帝命我行罰災此一方汝何聽老人言阻我去路汝今抗旨災首及汝言迄不見邈者大懼奔歸告其家人言未及終仆地而死嗣後遂有痘疽痘西瓜痘探頭痘等證死亡不可勝計

甲申四月鳳陽總督馬士英總兵黃得功剿寇內臣盧九德聞變南行江北郡縣擄掠一空

總漕黃希憲聞變南行挾持獨富東省士民多從之者山東總兵劉澤清至淮安安泉守將邱磊截其家口輜重數日得還

番山鶴

高傑之別號

首將李成棟至清江浦守將張士儀以火攻之殺護甚衆

五月閣臣高弘圖樞臣史可法督臣馬士英內監韓贊周盧九德科臣李沾聖臣左光先等共擁福藩世

子正位南京改元弘光遣諸臣分道安撫天下從龍定策諸臣進位有差

上命諸臣集議誰任居守誰任督守內監韓贊周言于衆曰馬相公弘才大略堪任督師史相公安靜甯一堪任居守士英不樂出鎮辭曰吾往歲擒劉超服老回回多負勤苦筋力憊矣無能爲也史老先生鎮撫皖城屢建奇績目今番山鷄已至淮南淮安士民仰公盛德不啻明神慈父督是師者非公而誰史公曰誠如公言毋乃過其實耶東西南北惟君所使吾敢惜頂踵私尺寸墮軍實而長寇仇乎願受命越數日遂進太子太保兵部尙書武英殿大學士視師淮揚

朝議既定以史公督師淮揚蘇州吳縣廩膳生盧渭率太學諸生抗疏爭之有秦檜在內李綱在外宋終北轅等語朝野傳誦以爲名言時人方之陳東云

時劉澤清據淮安維揚士民之懼番山鷄之乞據揚城也登埤固守堅不令入四野居民奔竄靡甯而高傑之兵殺人無忌莫敢攖鋒江都觀政進士鄭元勳恃其才之足以服衆也且認時局之線索在手岸然出而爲調人往來高營酣飲達旦傑復以幣餌之元勳氣益揚揚語于衆曰高帥之來勅書召之也馬士英聘書現在卽入南京尙且聽之況揚城乎百姓未知真實闕然以元勳與賊通賣揚城以市德遂共刃

之才骨片鱗咀嚼俱盡

先是士英用金幣往聘番山鷄弘光帝手詔有將軍以身許國帶礪共之等語

元勳有別墅在城西東南隅水色山光互相掩映顏曰影園壬午春日牡丹盛開得姚黃二本因言宋錢公輔園亭曾得此種賞花同時之客俱登崇階爲一代名佐元勳意頗自擬刻影園集徵名人詩歌以百什計而竟遭奇禍何也

元勳旣死番山鷄大懼因劫閣部于福緣庵羅列兵仗甲士環堵公夷然處之將及浹旬乃爲具疏以瓜步屯屯其士卒衆志稍安

高傑橫甚頭顱滿野聞督師來亦頗嚴憚分命將士黃夜掘坎埋齒掩骼升帳之日傑詞色俱變惴惴然若有不可測者及庭見時坦衷樸質平易近人偏裨亦各留茶自此將帥視爲易與矯命橫行大爲跋扈之勢矣

六月初議封黃得功爲靖南伯劉澤清爲東平伯劉良佐爲廣昌伯高傑爲興平伯是爲四鎮左良玉鄧芝龍唐通等進爵有差

七月安撫浙江監察御史左光先疏薦原任徐州碭山知縣應廷吉于朝有三式之學皆精天官之微更悉臣與久處信而有徵所當投大遺艱究其底蘊等語都覆授廷吉淮安府推官閣部具疏請之奉旨廷吉卽以淮安府推官職銜閣部軍前効用同得是旨者爲劉湘客通判張鑑紀克用等

揚州初定遂于八月督巡淮安點視劉澤清兵馬奏以澤清駐淮安高傑駐瓜揚黃得功駐儀徵劉良佐駐壽春各有分界

是月魯藩從東竟來信宿而去

唐藩從鳳陽來會于淮浦盤桓旬日唐藩以閣部有肄業之恩往還簡札稱門生唐藩先以罪廢禁錮高墻弘光帝登極閣部具疏救之

八月十五日閣部升帳忽旋風從東南起吹折牙旂一面其風旋轉丹墀良久方散公以廷吉初至軍前欲試其實卽命占之占曰風從月德方來爲本日貴人時當有貴臣奉王命而至者風勢旋轉飄忽其事爲爭音屬徵象爲火數居四二十日內當有爭鬪之事五日前後須防火且損六畜越三日城西北隅火焚死一驢燬民舍三間匝月遂有土橋之變而督師高太監以王命至公因其學之非妄也時咨問焉九月從淮抵揚初定從征文武官員經制俸廩之數開標額兵三萬人四鎮同之每鎮本色米三十萬石銀四十萬兩左良玉稱是各鎮不等

閣部請印七顆設督餉道印一顆以原任副使黃鉉掌之監軍道印一顆以原任副使高岐鳳掌之行軍兵部職方司郎中印一顆以黃日芳掌之同其官者爲秦士旂主事何剛施鳳儀等監餉同知一員以知

縣吳道玉署之無印監紀推官印一顆先後掌其印者爲原任僉事陸遜之原任知縣應廷吉同其官者爲劉景綽梁以樟呂彥良等從征立功爲原任翰林院庶吉士吳爾壘滁泗兵備石啟明開府推官李長康贊畫通判張鏐知縣殷埵支益等參贊等官不及備載侯方岳後至以爲桃源知縣督師大廳副總兵印一顆以李正春掌之督師中軍旂鼓印一顆以馬應魁掌之同其官者爲翟天葵陶正明等督師軍前賞功參將印一顆以汪一誠掌之

靖南伯黃得功標下監軍職方主事一員以馮元應爲之監紀推官一員以徐 爲之

東平伯劉澤清標下監軍道一員以淮海道加太僕寺少卿張文光爲之監稅知縣一員以原任贛榆縣知縣方來商爲之

東平鎮淮睚眦殺人無所顧忌北來朝臣韓如愈等悉被慘殺其餘泯泯者不能盡悉然頗指唯諸惟熊民之言是聽樊明片言轉移全活甚衆

廣昌伯劉良佐標下額設未詳

興平伯高傑標下監軍道一員以王相業爲之監紀同知一員以原任安塞縣朱統鏞爲之監紀通判一員以許鴻儀爲之

總河軍門王永吉標下監軍道一員以黃國琦爲之監紀推官一員以楊芬爲之

江北督師太監高起潛標下設額未詳

四鎮各私設行鹽理餉總兵監紀等官自畫分地商賈裹足鹽運不行各私立關稅不係正供東平則陽山安東等處興平則邵伯江堰等處多兇橫掠民不聊生

弘光帝既立以戶科右給事中左懋第加兵部侍郎總兵官陳洪範加宮保都督使北修和議懋第不屈以身殉難洪範放還尋亦被戮當事者議以阮大鍼爲兵部尙書舉朝爭之南都人夜書一聯于司馬堂闖賊無門匹馬橫行天下元兇有耳一人濁亂中原爾時弊政難以枚舉南都人復書西江月一詞于演武場云有福自然輪著無錢不用安排滿街都督沒人擡漏地職方多無賴本事何如世事多才不若多財門前懸掛虎頭牌大小官兒出賣

黃蜚自登州來欲覲南都路經淮揚慮爲高劉二鎮所掠以書致黃得功欣然以兵迎之弗虞高之尼其來也至邗關外五十里地名土橋角巾緩帶飲馬暮食高營三叉河守備不審其由以得功暗襲維揚報高高遂密布精騎于土橋左右而黃不知也俄而士馬圍合漸漸逼身馬不及介人不及裝箭集如雨得功以槍撥去無及膚者所乘戰馬價值千金攢簇而斃得功奪他馬而馳隨行三百騎盡爲高營收去疇昔之夜番山鶴以得功離鎮發兵離鎮千人夜襲儀徵守城副將卮鉞馬岱等偵知之相與謀曰高兵來以主帥他出也姑以舊城委之天明主帥必至內外夾擊吾事濟矣因閉門堅守令士卒飽食熟睡城

外四隅虛設烟火以爲疑兵薄暮高兵大至見已設備不敢前進又見烟火聯絡以爲黃兵營盤砲矢齊發夜半與火藥俱盡城中望見馬岱爭先殺出千人喪魄俄頃盡殲

番山鶴必欲以揚爲鎮屢肆要挾閣部爲請于朝維揚士紳又復大闕守土以無禍爲辭閣部遂遷于東

偏行署以督府居之入城日高夫人邢氏號令嚴肅頗稱安堵按邢氏闖賊李自成妻也番山鶴通焉自成覺之杖之百將殺之番山鶴挾而南奔

自成追之不及邢氏美而豔然嚴毅將士閣部銳意河南黃日芳陸遜之叩應廷吉曰師相將有事于中

州君意何若廷吉曰明年太乙在震角亢司垣始擊掩壽星之次當殞上將天下事未可知也聞東省探

細人至臨淄士民翹望王師如雨濟旱何不取道于東義聲直進彼中豪傑必有響應者二公默然

朝廷疏論時政有微刺公者曰督師之地爲招亡納叛之區閣部之前爲藏垢納污之所蓋指北來諸公

而言也公置之不辯于是東平各挾阿私上疏論薦中外之勢同水火矣

興平定居閣部遂如儀徵點視黃得功兵馬大闕于部賞資金帛千金有差

黃高交惡遂各治兵番山鶴曰曩昔千人皆維揚惡少嘗欲圖我我故驅之假手于黃君之士卒豈敢敗

軻也黃必欲報怨閣部不得已復之儀徵泊舟吾臺庵側以爲調釋值得功母夫人逝苦次與語稍霽色

焉因命監紀通判許鴻儀推官應廷吉往高營議和高雖聽命而所得馬匹匿弗肯還往反再四始償百

匹皆羸瘦不堪者解至黃營止收其半閣部復以二十四匹強之餘三十四匹漸次斃矣高不肯補閣部不得已償解三千兩復令高傑以千金爲黃太母贖憾始稍釋

南內出太祖時所積軍器及新造弓矢等件數可十萬副解赴閣部軍前路經儀徵聞黃營將士搶掠過半督藩令箭禁不能止黃營監紀推官徐某犯令者數人皆牧豎也閣部宥而弗治所失軍器亦不可問矣兵部主事馮元颺來見閣部以其名家子禮接之而倨傲不恭氣質與得功等遂令監黃軍蓋外之也

儀徵返旆決意河南之行番山鶴于初十日祭旂風吹大纛頓折紅衣大砲無故自裂傑曰此偶然耳遂于十月十四日登舟應廷吉私謂人曰旂斷砲裂已爲不祥今十四日俗稱月忌又爲十惡大敗何故登舟同列曰高藩幕下智囊濟濟豈無解此者詩曰無易由言莫捫朕舌廷吉曰其然吾言過矣

二十一日閣部暫駐清江浦遂奏李成棟爲徐州總兵官賀大成爲藩標先鋒總兵官陸遜之爲大梁屯田僉事胡蘄忠爲睢州知州冷時中爲開封府通判李長康爲開封府推官經略中原時原任戶部主事蔣臣歸安縣儒學生員韓繹祖後至閣部乞奏官之辭不受

諸藩各分汎地長江而上爲左夏玉汎地天靈州而下至儀徵三叉河爲黃得功汎地三叉河而北至高

郵州界爲高傑汎地自淮安而北至清江浦爲劉澤清汎地自黃家營而北爲史公汎地自宿遷至駱馬湖爲總河軍門王永吉汎地

關標張天祿爲前鋒鎮駐瓜洲許大成爲游擊領忠貫營李栖鳳爲甘肅鎮駐睢甯劉肇基仍總兵官駐高家集張士儀爲河協鎮駐王家樓沈通明爲參將駐白洋河

黃鉉督理糧餉往來常鎮何剛催趨糧餉往來蘇松兼理忠貫營事高岐鳳爲監軍道同李栖鳳協防睢甯黃日芳爲行軍職方郎中秦士奇施鳳儀副之應廷吉爲監紀推官吳道正爲監餉知縣馬應魁爲中軍副將翟大葵爲旗鼓陶匡明副之汪一誠爲賞功參將同駐白洋以任防河之役後北兵入揚州吳道正馬應魁陶匡明汪一誠等死之有使從北方來自稱燕山衛王百戶特書一函函題云某王致書史老先生閣下史公令中軍官厚加款待上其書于當令詞臣擬議報書以答之十月有旨以莫須有事捕安東副將邱磊下獄劉澤清自往唁之飲饌豐美把臂嗚咽且諭獄吏小心承值會當書疏請磊復職無何磊竟殺 雖史公奉 旨而行實東平修怨爲之也

十一月四日爲閣部懸弧之辰舟抵崔鎮各官免參急報剡城夏固山闌入宿遷史公愾然不樂亟召衆官舟皆未至惟應廷吉從因召見徐問曰在昔姜子牙張子房諸葛孔明何如人也廷吉對曰三公皆王

佐才不得位置優劣雖勳名事業成就不同則時有利不利也龐德公曰臥龍雖得其主未得其時斯言確矣公曰陳壽有言將略非其所長廷吉曰考之傳記孔明種種調度出人意料豈壽所能窺測他具論出師表云鞠躬盡瘁死而後已至于成敗利鈍非臣之明所能逆睹只此數言萬世人臣之軌則也公改容謝曰年兄教我矣廷吉與公同譜故云既而曰天上事已不可爲先帝變日予待罪南樞分固宜死轉念天下國家之重庶幾主器得人希紹一成之旅之烈不意決裂至此揆厥所由職由四鎮尾大不掉爲今之計惟斬四臣頭懸之國門以爲任事不忠之戒或其有濟昔之建議而封四鎮者高弘圖也從中主張贊成其事者姜曰廣馬士英也依違其間無所救正者余也又曰連日天象變異如許年兄何不擇其善者而言之廷吉曰據實而言猶疑僞妄敢臆說乎令取新書二冊贈廷吉而別 次日抵白洋河令廷吉監劉肇基軍高岐鳳監李栖鳳軍進取宿遷初八日黎明師濟河夏固山遁去遂復宿遷 越數日夏固山復圍邳州軍于城北劉李二將軍軍于城南兩將相望未嘗一矢相加樵採者出北兵諭之曰爾民卽吾民吾不殺汝好守城池毋爲他賊所據相持半月各引去

邳宿報至南都貴陽方箕踞而戲讀罷大笑哈哈不住時東省楊公士聰在座驚問曰邳宿淪陷幸而復完南北關係不淺公何泄泄爲貴陽曰君以爲誠有是事耶楊曰甯有無疾而呻者貴陽曰不然此史道

鄰之妙用也歲將莫矣陽河將吏例應叙功耗費錢糧例應銷算蓋爲敘功銷算地也楊且信且疑明春奉使河上始知無僞

復有使從北方來自稱鴻臚寺班周某者致書如前公不啟封沉之于水重資其人而遣之

鹵簿所至凡一技一能欲效用者皆投策進見隨試隨收月有廩餼以推官應廷吉董其事命曰禮賢館于是四方倖進之徒接踵而至甚有獻策請鬻三山街大功坊以助軍餉者棐臣病之白史公曰是皆躍冶之士究無實用所捐糶糜亦百姓脂膏也曷不遣此輩歸塾就業另儲真才以副實用乎公曰吾將以禮爲羅冀拔一于千百以濟緩急耳廩之如故相聚數月既無拔萃之才亦無破格之選始私相謂曰求之甚殷遇之甚疎吾輩其齊門之瑟也夫稍稍引去城破日從公及于難者止一十九人

額餉難設所入不敷所出遂以戶部主事施鳳儀行鹽揚州

揚州爲高藩汎地不隔碍不行復以周某爲理餉總兵興販米豆官私夾帶上下爲奸利之所入不全在官遂議屯田以陸遜之爲大梁僉事官給牛糧籽粒另設屬員迄無成功復欲應廷吉屯田邳宿廷吉辭曰國家屯政原有成額小民世受謂之恆產焉所謂閒曠而屯之且屯田籽粒既入于官有司常賦又何從出聞之桃源縣生員有愿輸牛百頭小麥五百石以請縣官者斷無是事爲此言者欺公也公不以爲

然強之視屯田僉事事

朔風日勁河陽倍嚴因令秦士奇等沿河築墩以爲施放砲火之地應裴臣曰是無益也黃河兩岸沙磧
坎窟土性虛浮春水泛漲斷必傾圯安能架砲而同事諸公方欲以築墩多少爲己功且欲爲富室進
身地議格不行迄今兩岸一望平沙墩基尙存識者嗤之以爲搏沙之智

延陵鄉紳朱一馮者虎踞灘田盈千累百家殷富衆怨所歸公慮經費不足輒造其廬請助餉萬金以塞
衆口朱不理焉及興平鎮揚膚訴者沓至興平遂疏于朝追贓數十萬減至四萬力不能完一馮浮海赴
閩第三子庠生號長源者受刑追比羈管社學隆冬隔宿卸棧墮其二指後北兵入復與戴姓兄弟糾集
灘兵橫行衡命戴已就戮一馮父子不知所終

明季稗史彙編卷二十四終

青燐屑

慈谿應喜臣著 更名廷吉字聚臣戊辰進士

乙酉元旦大風拔木雪積數尺自臘迄春陰凝不霽白洋河干聊為綿蕞飄灑浸潤竟不成禮閣部以糧

餉不前諸軍飢餒斷葷絕飲蔬食啜茗而已興平至徐州程肖宇率驍健之士六人以降 肖宇豐沛間大盜也聚千衆數

攻掠無忌 思宗末年百戰獲之下廷尉獄未正厥辜 闖賊躡入釋之而南仍復為盜長興平強盛率衆附降興平遂與歃血定盟餽遺酬酢略無虛日浹旬酒

酣俱殺以殉及至永城鄉紳某者蓄積甚厚輸犒數千興平亦與定盟旋復見殺并籍其家故許定國力

為之備 興平所宅徐州館舍極其精潔忽異物疊見坐臥不甯陡于白晝無因而火興平胸首俱焦狼

狽走出隨身寶玩灰燼無餘爰是決意北征抵睢城焉

天啟甲子七月五星聚張辛巳春黃河潤漕艘不行錢塘江舟人炊飯水入釜為火壬午秋熒惑入南斗

棊臣歎曰伯陽父有言今周之德若二代之季矣象緯告凶名川枯竭將毋同乎是時黃河清泗州麒麟

見閣部謂棊臣曰是非休徵與將謂有建武紹興之事也棊臣曰天心仁愛托物徵奇魯狩獲麟未聞為

尼山之瑞公臆然而起